


心鏡編上



BJ  
1548

T28  
1747

V.1









心

難

難



心  
鏡  
編



序

無所慕而爲善無所畏而不爲惡者此上知也世有幾  
人導之而不爲善儆之而自爲惡者此下愚也世有幾  
人故勸懲之道重焉凡勸懲之道要在使人一觸目輒  
聳然動念惶然改慮譬猶鏡之鑑妍媸然鏡無蓄形臨  
鏡者果燁乎如花溫乎如瑩不獨奪人目精先已奪已  
之目若嫫姆倭傀何待善譽者不能掩其醜已先自憎  
其醜矣顧人但知鏡貌之鏡不可以有形逃詎知鏡心  
之鏡更不可以無形遁見一善言善行而不聳然動見



一不善之言不善之行而不惶然改是無人心者也夫  
人心本如鏡也其忽焉墮入于惡也猶至明之鏡氣一  
呵上卽時障蔽也其漸染于惡而不知不覺也猶至明  
之鏡日受垢膩漸爲所蒙翳也苟非勤加拂拭其爲明  
也幾何余自幼見刊行勗善等書輒孳孳不倦隨手摘  
錄秘之篋中雖未敢謂奉行有素而清夜捫心必求有  
合乃始成寐否則徬徨達旦因思鏡貌之鏡不可一日  
離鏡心之鏡獨可一日舍乎邇年來游歷浙之東西見  
有鄉先生纂述格論及自立言垂爲家訓者閒窗彙集



而檢閱之其有合聖賢之旨兼可以醒人目者復加採  
入遂亟取付梓以公同志顏之曰心鏡豈以鏡人哉鏡  
已耳昌黎云刮垢磨光言既鈍之鏡刮之磨之仍可獻  
其朗誰謂心之光明有是編以拂拭之猶或疲于屢照  
乎勸懲之道于是有取焉世不乏好善君子幸卽一人  
之鏡爲人人之鏡也可乾隆十二年歲在丁卯夏四月  
上浣粵東古岡州譚文光質菴氏題







凡例

一是書之刻爲勸善也顧善未有不本于理者古聖敎人首重明倫倫明則大本旣立雖曰未學吾必謂之學矣故分門以敦倫爲第一卷

一彙纂嘉言何書不可据摭然仙經佛籙與夫巷語街談槩不敢載間有摘入者姑取其不墮元虛不流猥鄙聊附以醒聾瞶若卷首必本先賢格論爲宗主

一是編自採錄刊行諸本外其叅入者則得之浙中見聞居多另採諸子百家凡若干條俱向所未備



一每卷談理爲主證事次之稗官野史見見聞事不勝載或擇一二信而可據者寔之亦小學遺意也

一是書之分十類取成數也其無所附屬者亦以類相從如言行則附見于修身積德等門出處則附見于涉世樂天等門報應則附見于積德愛物等門閱者毋謂爲淆混

一每門條數多少總期理足而止前人著述儘繁不敢以語句之新異書重筆複其有未備者卽韻語亦間採焉



一每條各註以書名所以便考核也其有他本未註卽註他本書名不沒所自兼寓揚善之意云

一是書止期指示明切可觸目警心錯綜登入世之古今人之先後不拘焉

一凡訓世格言如惜字放生等編牋幅刊布者顏垣破壁亦粘一紙不復逐條載入恐涉數見也

一凡閱善書苦無耐心茲編不尚新奇亦不入迂腐俚鄙置之案頭隨時展玩始而敦倫繼而立身終而安命不無小補云



一  
是書纂輯旣成用當韋弦之佩而已緣勸梓者衆遂  
取付刷手仁人君子其必有以教我矣若謂蒐輯已  
備則固不能免于掛一漏萬之譏也

質菴氏謹識



心鏡編目錄

卷一

敦倫

共計七十九則

卷二

修身

共計一百十九則

卷三

勤學

共計四十七則

卷四

積德

共計六十則



卷五

治家

共計六十一則

卷六

居官

共計六十五則

卷七

涉世

共計七十七則

卷八

愛物

共計二十八則

卷九



樂天 共計四十六則

卷十

養生 共計三十二則







心鏡編卷一

岡州譚文光質菴氏輯

敦倫

體元者。人君之職。而調元者。宰相之事。

胡文定公

有道之君。正其德以蒞民。而不言智能聰明。智能聰明者。下之職也。所以用智能聰明者。上之道也。

管子

晉平公問叔向曰。昔者齊桓公九合諸侯。一匡天下。不識臣之力否。叔向曰。管仲善制割。賓須無善削縫。隰朋善純緣。衣成若舉而服之。亦臣之力也。君何力之有。師



曠伏琴而笑之。公曰。太師奚笑也。曠對曰。臣笑叔向之對君也。凡爲人臣者。猶庖宰和五味而進之君。君弗食。孰敢強之也。臣請譬之。君者。壤地也。臣者。草木也。必壤地美。然後草木碩大。亦君之力也。臣何力之有。韓子

忠之道有三。以道覆君而化之。是謂大忠。以德調君而輔之。是謂次忠。以是諫非而救之。是謂下忠。韓詩外傳

下臣事君以貨。中臣事君以身上。臣事君以人。荀子

文潞公處大事以嚴。韓魏公處大事以膽。范文正公處大事曲盡人情。三公皆社稷臣也。朱文公論本朝人物。



以范文正公爲第一。

東谷贅言

謝諫議似最知人。平生薦不過數人。皆至宰相。每發薦

牘。必焚香望闕再拜曰。老臣又爲陛下得一人矣。

德慧錄

任事者。當置身利害之外。建言者。當設身利害之中。此

二語。其宰相臺諫之藥石哉。

長者言

劉誠意基家居。高廟詢以天象。悉如條答。謂霜雪之後。

必有陽春。今國威已立。宜濟以寬。

誠意本傳

蔡忠惠公襄云。事父母之道曰孝。天之性也。事君上之  
道曰忠。人之義也。猶耳目心腹有身則有之。非外物也。



邇代以旌賞勸其孝。爵祿勸其忠。則孝非天之性。忠非人之義矣。猶無耳目心腹。豈爲人歟。乃亦若鷺白鳥玄蓋物之本然也。苟染而色之。何可長也。惟忠孝待勸而行。詎至孝至忠乎。

自警編

真宗問李文靖曰。人皆有密啟。而卿獨無何也。對曰。臣待罪宰相。公事則公言。何用密啟。夫人臣有密啟者。非讒卽佞。臣常惡之。豈可效尤。

楊龜山

夫大臣者。以道事君者也。士君子隱居求志。正豫養斯道。爲致君澤民之本。一旦得君而事大用之。則伊呂之



勳。小用之則龔黃之業。自古大臣。未有不講於道而可  
以事君者也。鹿門子

蕭何不與曹參相善。及何病。惠帝自臨視。因問曰。君卽  
百歲後。誰可代君。對曰。知臣莫如主。帝曰。曹參何如何。  
頓首曰。帝得之矣。臣死不恨矣。漢書

韓魏公言。王沂公當國。門下未嘗見顯拔一人。希文乘  
間輒諷之曰。明揚士類。宰相之任也。公之盛德。獨少此  
爾。沂公應之曰。司諫不思耶。恩若已出。怨將誰歸。希文  
惘然曰。真宰相也。自警編



人臣得君而事。便以父母之身。委之朝廷。身且不有。遑恤其他。故自古忠臣。知有公而不知有私。知有國而不知有家。鞠躬盡瘁。死而後已。

金少藹先生

對人主語言及章疏文字。須要溫柔敦厚。如子瞻詩。多於譏玩。殊無惻怛愛君之誠。荆公在朝論事。多不循理。惟是爭氣而已。豈可以事君。君子之所養。要令暴慢邪僻之氣。不設于身體。

龜山先生

寇萊公當國。真宗有澶淵之幸。而能左右天子如山。不動却戎狄。保社稷。天下謂之大忠。

自警編



龐莊敏公爲相。專以公忠便國家爲事。不以官爵養私交。取聲譽。端明殿學士程公戡知益州。將行。上俾公謝之。曰。戡還當處以兩府。公曰。茲事出于上恩。臣不敢與聞。卒不與言。全上

忠義之心。人皆有之。惟其執之不固。勉之不力。是以不及于古人。韓魏公

羅仲素云。天下無不是底父母。了翁聞而善之。曰。惟如此。而後天下之爲父子者定。彼臣之不忠。子之不孝。常始于見其有不是處爾。續自警編



爲子者當先意承顏。諭父母于道。不幸而父母有過。又當從容諫諍。必至于無過之地而後已。苟視親有過而不諫。與用言相激而不恤。大非孝也。

教家要畧

世之善爲人子者。常善爲人父。不能孝其親者。常能虐其子。此無他。賢者能自反。則無往而不善。不賢者不能自反。故爲人子則多怨。爲人父則多暴。

規家日益編

愛子之道在教。教子之道在嚴。嚴斯成之也。愛而不教。猶不愛也。教而不嚴。猶不教也。區區飲食衣服。末矣。

周逸

書



入孝出弟。人之小行也。上順下篤。人之中行也。從道不從君。從義不從父。人之大行也。荀子

康叔伯禽。失子弟之道。見于周公。拜起驕悖。三見三笞。往見商子。令觀橋梓之樹。二子見橋梓。心感覺悟。以知

父子之禮。論衡

天子孝。龜龍負圖。庶民孝。草木榮茂。素履子

父。母子之天地。與無天何生。無地何形。楊子

孝子事親。不可使親有冷澹心。不可使親有煩惱心。不可使親有驚怖心。不可使親有愁悶心。不可使親有怨



恨心不可使親有愧悔心不可使親有缺少心不可使  
親有難言心先意承志盡力服勞此之謂悅親此之謂  
色養此之謂順德世人無所不愛而愛兒女之心最真  
吾謂爲人子者不必他求只以體貼兒女之心體貼父  
母便是至孝

羅氏世編

父慈而子孝此常事不足道惟父母不慈而子不失其  
孝乃真孝子也

韓魏公

具此身者人皆有親無親則與禽獸等矣故立善多端  
惟在于孝所謂孝者惟在隨分自盡不必割股剖肝然



後爲孝。父母恩同天地。此身皆父母所有。所恃以報恩者。惟此心也。同善錄

易曰。家人有嚴君焉。父母之謂也。父義母慈。母何以亦稱嚴。蓋母之不嚴。家之蠹也。瀆上下之分。庇子孫之過。亂內外之別。嫚帷薄之儀。父雖嚴。有不能盡察者。必父母俱嚴。內外齊肅。然後父子兄弟夫婦之間。各盡其道。而家道正也。故曰。家不難于有嚴父。而難于有嚴母。不難于有嚴母。而難于有順父之嚴母。父所振飭。母奉以行。而後家道之正。無或有不正者以敗之。其嚴也。乃所

以爲順也。故彖傳曰：嚴君而六四之傳曰：順在位。苟或不順，是二君也。其能治乎？

南山讀書錄

婦于舅姑，以人合者也。子于父母，以天合者也。從來未有子不孝父母，而婦獨能孝公姑者。故凡婦之失禮，皆其子有以致之也。天誅神罰，豈可盡責之婦人乎？願爲人子者省之。

同上

父母生我，自取一乳名起。百凡事務，無不祝願到好處。我乃不自保惜，萌一邪念，行一非義，至不齒于人類，不亦可以愧死哉？人能常念及此，自不敢爲不肖之子矣。



承菴家訓

人人生子。不以爲異。若論人生一箇人出來。耳目口鼻。四體百骸。悉具。豈非天地間至祥至瑞耶。和氣致祥。一毫乖戾。生不來。卽生得來。亦決非善物。

同上

五刑之屬三千。罪莫大于不孝。然世有不孝之子。而未嘗受不孝之刑者。只因父母之心。本于慈愛。子孫悖謾。不欲聞之官司。富貴者恐貽羞門戶。貧賤者亦望其反哺。而曲加含忍。容隱。故不孝者或免于刑。然父母吞聲飲恨之際。不覺怨氣所感。是以世之不孝者。或斃于雷。

或死于疫。或後世必至衰微。蓋王法可幸免。天刑終不可逃。人可不惕然省乎。

胡師蘇

凡人父可以仗子。子不可以仗父。父仗子者。已發則有接手。未發則得幫手。如子必仗父。不爲乖橫之醜。驢卽爲嫖賭之敗類。至于鮮衣美食。癡福庸庸。握算持籌。謀生逐逐。尚其次之。可取者。若能清白自守。訓子成人。則尤稱克家之子。後不可量者矣。

姚氏家訓補

凡言孝必帶言順。蓋孝者順也。故曰不順乎親。不可以爲子。如同一言也。與爾子言則爲嚴父。與父母言則爲



逆子矣。况唐突與觸忤乎。施之朋友且不可。况父母乎。  
故進言自有法。言固如是。惟色亦然。孔子曰。色難。溫節  
孝。嘗言一副冷面孔。父母看之。其實難當是也。故要盡  
孝。平時須先做涵養工夫。變化氣質。若徵于色。發于聲。  
是待僕隸下人之道也。然遇豪奴悍婢。卽不敢以此加  
之矣。至束縛之。駕馭之。是待馬牛犬豕之道也。父而懦。  
隱忍而不發。必病且殆。父而強。不怒于色。則怒于言矣。  
病且殆。子受惡名。怒于言。則父子相夷矣。故曰。孝者順  
也。大舜盡孝。總不出一順字。

嚴述曾草舍漫錄

凡人之子。性行不相遠。而有後母者。獨不爲父所喜。父無正室而有寵婢者。亦然。此或父之昵于私愛。然爲子者。當一意承順。則天理久而自協。人倫要旨

人子一生大事。止此送終一事。于此而心有不盡。無復可盡之心矣。奈何以兄弟衆多。彼此相諉。致有後日之悔。竊以爲長子力能獨任。不必更求衆子。衆子之中。力或可辦。便當以爲己任。不必偏累長子。各人行孝。各人盡心。爭先致力。纔是人子。古之孝子。遇親之難。爭先赴死。以求相代。彼且于生命可捨。何區區財物足云。醒世良箴



兄弟同受形父母。雖生有先後。其初只是一人之身。所謂骨肉至親也。人惟不明此理。故悖逆天性。生雖同胞。情猶吳越。居雖同室。迹若路人。不知薄兄弟。卽是薄我父母矣。可歎。可歎。胡師蘇

人有數子。無所不愛。而于兄弟則相視如仇讐。往往其子承父意。遂不禮于伯叔父者。殊不知已之兄弟。卽父之諸子。已之諸子。卽他日之兄弟。我于兄弟不和。則我之諸子。更相視倣。能禁其不乖戾否。子不禮于伯叔父。則不孝于父母。亦其漸也。故欲吾之諸子和。須以吾之

處兄弟者示之。欲吾子之孝于已。須以其善事伯叔父者先之。

袁氏世範

世之人設樽俎會聚賓客。雖日費萬錢。畧不掛齒。至于同胞兄弟。分門析戶。視若秦越。或因寸土之地。斗粟尺布。爭訟不已。是誠何心哉。

蒙南鄉約

人家兄弟不和。多因爭財產之小利。溺婦女之私愛。爾不知財產乃身外餘物。婦女乃異姓相聚。終不如我兄弟至親。後漢薛包。好學篤行。弟子求分財異居。包不能止。乃中分其財。奴婢引其老者曰。與我共事久。若不能



使也。田廬取其荒頽者。曰我少時所理。意所戀也。器物取其朽敗者。曰我素所服食。身口所安也。弟子數破其產。輒復賑給。隋牛宏爲吏部尚書。弟弼嘗醉射殺宏駕車牛。宏還宅。妻迎謂曰。叔射殺牛。大是異事。宏曰。已知顏色。作脯坐定。妻又曰。叔射殺牛。大是異事。宏曰。已知顏色。自若讀書不輟。如二人者。彼于兄弟之愛。豈財產婦女所能奪也。

胡師蘇

人家兄弟。常作二想。則無不爲友。兄恭弟矣。二想者何。當養生送死時。應作譬如父母少生一子想。當析產授

業時應作譬如父母多生一子想

南山讀書錄

人家兄弟無不義者。盡因娶婦入門。異姓相聚。爭長競短。漸漬日聞。偏愛私藏。以致背戾。分門割戶。患若賊讐。皆汝婦人所作。男子剛腸者。幾人能不爲婦言所惑。吾見罕矣。若等豈有是耶。

柳承翰家訓

兄弟間偶有不相愜處。卽宜明白說破。隨時消釋。無傷親愛。看大舜待象傲。未嘗無怨無怒也。只是箇不藏不宿。所以爲聖。

同善錄

嫡庶之分甚嚴。兄弟之情無間。有因妾生子而遽令小



並大者。此不學之人也。有以嫡之子而公然長凌少者。此不肖之尤也。總之爲父者。不溺私愛而蔑大義爲子者。不緣異母而乖同氣。則兩得之矣。

姚氏家訓補

古人睦族。非止同宗。以族服考之。父族母族妻族皆是。昔晏平仲敝車羸馬。桓子以爲隱君之賜。晏子曰。自臣之貴。父族無不乘車者。母族無不足于衣食者。妻族無凍餒者。齊國之士待臣舉火者。三百餘人。如此而爲隱君之賜乎。彰君之賜乎。先父族。次母族。次妻族。而後及疎且遠者。是謂以其所愛。及其所不愛也。晏子可謂善。

睦族矣。今人不明此義。故有千金飾裘馬。而同氣競錙銖。一日食萬錢。而宗族不免于飢寒者。此其人可與晏子同日語哉。厚于人倫者。當不若此。省之省之。胡師蘇

夫綱振立。刑于有道。使室人凡事敬順。情欲之感。無介于儀容。宴私之意。不形于動靜。則刑于不難矣。語云。妻妾乃屋漏之史官。慎之哉。同善錄

宋宏曰。糟糠之妻不下堂。貧賤之交不可忘。通鑑

禮服傳曰。妾事女君。與事舅姑同也。婦事夫。有四禮焉。雞初鳴。咸盥漱。櫛縱筭總而朝。君臣之道也。惻隱之恩。



父子之道也。會計有無。兄弟之道也。閨閫之內。衽席之上。朋友之道也。

古學彙纂

夫者。扶也。以道相扶者也。婦者。服也。以禮屈服者也。

白虎

通

妾之爲言接也。言得接見于君子。不得伉儷也。

禮疏

夫婦敬。則家多賢子。故親迎以先之。告廟以重之。

朱子

凡婦人不能育子。而復禁其夫之納妾。以致無後。論其罪。則爲極惡。論其情。尤爲大惑。蓋妾若生子。嫡母尊于生母。前賢制禮。朝廷立法。凡喪服誥贈。首先推尊嫡母。

則是妾之生子。與親生何殊。而必妬嫉生心。試思瑩瑩無倚。族屬爭財。曷若令其夫畱存嫡血。已亦與有依賴乎。  
醒世良箴

中年喪偶。或謀續絃。必使前邊兒女。視後母卽生母。爲後母者。亦必視前之兒女卽已子。此其要只在做家主。的。用。心。周。到。立。身。端。正。  
同上

劉廷式既定婚。越五年登第歸。則此女雙瞽矣。女家曰。女子已爲廢人。何可奉箕箒。廷式竟娶之。及倖高密。盲女得疾死。哀哭良切。東坡時爲守。慰諭之曰。余聞哀生。



于愛。愛生于色。子娶盲婦。愛從何生。廷式曰。某所亡者。妻所哭者。妻而已。若緣色生愛。緣愛生哀。色衰愛絕。于義何有。今之揚袂倚市。目挑心招者。皆可使爲妻乎。東坡拊其背曰。眞丈夫也。

德慧錄

一夫一婦是正理。若年四十而無子。不可不娶一妾。然中間却有箇處法。不善調停。使妻妬而不容。妾悍而難馭。安望其生且育哉。調停謂何。自處于正而已。

姚承菴家訓

聖人之序五倫。終之以朋友之交。朋友爲五倫之一。而寔輔之以全五倫之道者也。朋友責善。不過欲其無忝。

于人倫而已。故事君得以全其忠。事親得以成其孝。兄弟得以和。夫婦得以義。是使君臣父子兄弟夫婦之間。得交盡其道而無悖者。皆朋友力也。故朋友之于人倫。義若輕而寔重。分若疎而寔親。善交友者。當以信義爲先。篤于信義。自然相知以心。相依以命。相托以妻子。相賙以財帛。相資以道德文章。相成以功名事業。相恤以疾病患難。如此豈復以富貴而驕。貧賤而忽。死生存亡而寒盟爽約乎。是之謂君子之交。

余少藹先生

禮記云。君子之交淡如水。小人之交甘如醴。君子淡以



成。小人甘以壞。交友者。最宜詳味。

愚齋晤言

與善人居。如入芝蘭之室。久而不聞其馨。卽與之化矣。  
與不善人居。如入鮑魚之肆。久而不聞其臭。亦與之化  
矣。丹之所藏者赤。漆之所藏者黑。是以君子必慎所與  
處焉。家語

與賢于己者處。則自以爲不足。與不賢于己者處。則自  
以爲有餘。以爲不足。則日益。以爲有餘。則日損。

范敦夫

朝廷大奸。不可不攻。朋友小過。不可不容。容大奸必亂  
天下。攻小過則無全人。

陳眉公

人之性行。雖有所短。必有所長。與人交游。若常見其短。不見其長。則頃刻不可同處。若常念其長。不顧其短。雖終身與人交游可也。

袁氏世範

凡朋友問難。縱有淺近麤疎。或露才揚已。皆是病發。當因其病而藥之可也。若便懷鄙薄之念。非君子與人爲善之心矣。

王文成公

朋而不心。面朋也。友而不心。面友也。

楊子

詳交者不失人。而泛交者多後悔。故曩哲先擇而後交。不先交而後擇。

葛洪



適心者。交淺而愛深。忤神者。接久而彌乖。是以聲同則  
傾蓋。而若昵。道異則白首而無愛。抱朴子

君子以同道爲朋。小人以同利爲朋。歐陽文忠公

與人交。不爲人所信。義未至也。仲長統

交道之喪久矣。高者不過鬪炫詩文。下者乃至徵逐酒  
食。其聚會也。或甘言巧笑以取悅。或深情厚貌以相遁。  
求其責善輔仁者。蓋千百不得一焉。予爲之慨然而憂。  
惕然而恐。壬午春。有同志斯道者十餘人。爲直言社。平  
居自考。咸有日記。赴會之日。各出所記相質。顯而威儀

心影錄卷一  
之際微而心術之間大而君父之倫小而日用之節講  
論切偲必求至當之歸而後已諸子奮志進修日新月  
異苟一言不合乎道一行未得乎中小經指摘立自刻  
責飲食俱忘

黃陶菴社集日記錄敘

師弟與朋友同類而勢分等子君父

朱子

人有恒言霜降水涸涯涘乃見諺曰若不同來臥安知  
被裏破蓋朋友之合簪誰無情誼必要其終然後見君  
子小人之用心

東谷贅言

情不可過會不可數抑情以止慢疎會以增敬終身守



此然後故舊可保。陳白沙

同人與居。視其有過而不告。則于心不安。告之而不受。則奈何。曰。與之處而不告其過。非忠也。然要使誠意。交通于未言之前。則言出而人信之。又曰。責善之道。要使誠有餘。而言不足。則于人有益。而在我無自辱矣。程子遺書

以詐待友。初若可以籠人。久而詐露。反爲友怨薄矣。以誠待友。初惟自盡其心。久而誠孚。益爲友敬服矣。黃德錄

一死一生。乃知交情。一貧一富。乃知交態。一貴一賤。交

情乃見。史記

聞君子議論如啜苦茗森嚴之後甘芳溢頰聞小人諂笑如嚼冰爽美之後寒沍凝腹

明心寶鑑

今人與朋友交但酒食游戲相徵逐羣居終日言不及義浮誇之氣多詩書之氣少每至失色于人失言于人內而見父母外而見大賓舉止傲慢出言鄙倍識者竊笑之恬然不覺也何則氣不斂心不收則無以檢點其身心無以檢點其身心則無以應事而接物故曰毋友不如已者又曰君子以文會友以友輔仁

嚴西齋草舍漫錄



心鏡編卷二

修身

伊川先生曰。人于外物奉身者。事事要好。只有自家一箇身與心。却不要好。苟得外物好時。却不知自家身與心。已先不好了。二程語錄

志不立。天下無可成之事。雖百工技藝亦然。今學者曠廢隳惰。玩歲愒時。而百無所成。皆由于志之未立耳。故立志而聖則聖矣。立志而賢則賢矣。志不立。如無舵之舟。無銜之馬。漂蕩奔逸。終亦何所底乎。王陽明先生

學道之人。每日于十二時中。遇物應緣之處。不得令惡念相續。苟或照顧不著。偶起惡念。便當急著精彩。拽轉頭來。若隨他相續不斷。則障道結業。神嗔鬼責矣。大慧禪師

今之持敬者。多拘迫。故覺屢墮不快活。血氣且不得舒暢。如何得道理發生。不知敬是我心自做主宰處。不消苦著力。只略綽提撕。便是文公所謂覺得心放心。便在了。可謂發于聖不傳之妙。同善錄

修之于身。其德乃真。修之于鄉。其德乃長。修之于國。其德乃豐。修之于天下。其德乃普。李伯陽



君子之所謂敬畏者。非有所恐懼憂患之謂也。乃戒慎。不覩。恐懼。不聞之謂耳。君子之所謂灑落者。非曠蕩放。逸縱情肆意之謂也。乃其心體不累于欲。無入不自得之謂耳。是灑落生于天理之常存。天理常存。生于戒慎。恐懼之無間。

同善錄

真正大英雄人。却從戰戰兢兢。臨深履薄處。做將出來。若是氣血粗豪。却一點使不著也。

朱文公

或問子能無心乎。迂叟曰。不能。若夫回心。則庶幾矣。何謂回心。曰去惡而從善。捨非而從是。人或知之而不能。

徒以爲如制悍馬如斡礮石之難也。靜而思之在我而已。如轉戶樞何難之有。溫公嘉謨集

趙康靖公槩厚德長者。口未嘗言人短。中歲嘗置黃黑二豆于几案間。自旦數之。每興一善念。則投一黃豆。興一惡念。則投一黑豆。暮發視之。初黑豆多于黃豆。漸久反之。旣謝事歸南京。二念不興。遂徹豆無可數。人強于爲善。亦要在造次之間。每自防檢。此與趙清獻焚夜香日告其所行之事于上帝同也。自警編

富鄭公年八十。書座屏曰。守口如瓶。防意如城。在公尚



然。況他人乎。張子韶

荀子曰。積土成山。風雨興焉。積水成淵。蛟龍生焉。積善成德。而神明自得。聖心循焉。故無冥冥之志者。無昭昭之明。無昏昏之事者。無赫赫之功。勸學篇

有盛待制名濤者。嘗有語云。士大夫行已。正如室女。常須置身在法度中。不得受人指點。元誠語錄

賈內翰黯以狀元及第歸鄧州。范文正公爲守。內翰謝文正曰。某晚進。偶得科第。願受教。文正曰。君不憂不顯。惟不欺二字。可終身行之。內翰拜其言不忘。每語人曰。

吾得于范文正者。平生用之不盡也。嗚呼。得文正公二字者。足爲一代之名臣矣。自警編

趙清獻公無一事不可以告天。司馬溫公無一事不可以告人。嗚呼。必如此。庶幾可謂不欺心。綠雪亭雜言

薛文清公曰。工夫切要在夙夜飲食男女衣服動靜語默應事接物之間。于此合天。則道不外是矣。每日不問大事小事。處置得宜。則業廣修德行義之外。當一聽于天。若計較利達。日夜思慮萬端。而所思慮者。又未必遂。徒自勞擾。祇見其不知命也。繹訓編



楊慈湖先生曰。吾少時初不知已有過。但見他人有過。一日自念曰。豈他人俱有過。而我獨無耶。乃反觀內索。久之得其一。而又觀索。又得二三。已而又索。吾過若此其多。乃大懼。乃力改。日益編

王陽明先生曰。勿以無過爲聖賢之高。而以改過爲聖賢之學。勿以其有所未至者爲聖賢之諱。而以其常懷不及者爲聖賢之心。警語類鈔

謝良佐與伊川別一年。往見之。伊川曰。相別又一年。做得甚工夫。謝曰。也只是去箇矜字。曰。何故。曰。仔細檢點。

得來病痛盡在這裏。懷言錄

薛文清自少卽厭科舉之學。慨然有求道志。爲御史。差監湖廣銀場。手錄性理大全。晨昏覽讀。精思密玩。值雪盈几。不輟。有得。秉燭疾書。或通宵不寐。嘗曰。某二十年治一怒字。尚不能消磨。方信克己之難。劉文肅曰。某生平最受此字之害。敢不奉斯言爲師訓。皇明名臣錄

王陽明先生曰。樹木者必培其根。種德者必養其心。欲樹之長。必于始生時刪其繁枝。欲德之盛。必于始學時

去夫外好。學古彙纂



導筋骨。則形全。剪情欲。則神全。靖言語。則福全。洞靈經

王荆公方盛氣議天下事。程明道曰。天下事非一家事。願公徐議之。此如持冷泉沃炎火。欲不渾身通冷得乎。  
雪濤小書

王陽明先生曰。今人病痛。大段只是傲。千罪百惡。皆從傲上來。傲則自高自是。不肯屈下。傲之反爲謙。謙字便對症之藥。非但是外貌卑遜。須是中心恭敬。常見自己不是。真能虛已受人。堯舜之聖。只是謙到至誠處。便是允恭克讓。溫恭允塞也。最樂編

人之不幸。莫過于自足。恒若不足。故足。自以爲足。故不足。甕盎易盈。以其狹而拒也。江海之深。以其虛而受也。虛已者。進德之基。灼文集

薛文清公每就枕。必思一日所行之事。所行合宜。則恬然安寢。或有不合。卽輾轉不能寐。思有以更其失。又慮始勤終怠也。嘗書以自警。公持守最嚴。每呼此心曰。主翁在室否。警心錄

康齋剛毅疾惡。慕明道之和易。凡遇逆境。必加含容。用力旣久。渾然無圭角之露。嘗語學者曰。吾平生得患難。



進學皇明寶善錄

雲長公生前忠勇。死後威靈萬古以來一人而已。然史稱公喜讀左傳。而言語文字不少。概見今傳對一聯云。出公筆。願天常生好人。願人常行好事。噫。此二語者。何善與人同。廣大若此哉。雪濤小書

耕堯田者有水患。耕湯田者有旱患。耕心田者無憂無患。日日豐年。樵談

欲淡則心清。心清則理見。丹鉛錄

禦寒莫如重裘。止謗莫如自修。是卽孟子告貉稽意。吳百

峰日記

專涵養上用工者。日見其不足。專識見上用工者。日見其有餘。日不足者。日有餘矣。日有餘者。日不足矣。吾輩用工。只求日減。不求日增。減得一分人欲。便是復得一分天理。王文成公

火發外明者。薪之盡也。神知外見者。扑之散也。故曰聖人以此洗心。退藏于密。鶴林玉露補

今人屏絕思慮。以求靜。聖賢無此法。聖賢只戒謹恐懼。自無許多閒思妄想。不求靜。未嘗不靜也。陳白沙先生



范忠宣戒子弟曰。人雖至愚。責人則明。雖有聰明。恕己則昏。但當以責人之心。責己。恕己之心。恕人。不患不到聖賢地位。古今藥石

青天白日。和風慶雲。不特人多喜色。卽鳥鵲且有好音。若暴風怒雨。疾雷閃電。鳥亦投林。人思閉戶。故君子當以太和元氣爲主。格言鈔

說人之短。而乃護己之長。誇己之長。而乃忌人之長。皆由存心不厚。識量太狹耳。若能克去此弊。豈惟進德。且以遠怨。胡師蘇

不自重者取辱。不自畏者招禍。不自滿者受益。不自是

者博聞。景行錄

世人破綻處。多從周旋處見。指摘處。多從愛護處見。艱

難處。多從貪戀處見。小牕清紀

衣垢不煎。器缺不補。對人猶有慙色。行垢不煎。德缺不

補。對天豈無媿心。省約三書

有人夜怕鬼。陽明先生曰。卽是平日不能集義而心餒。故怕。若素行合于神明。何怕之有。或曰。正直之鬼不須恐。邪鬼不管人善惡。故未免怕。先生曰。豈有邪鬼能迷



正人乎。卽此一怕。便是心邪。故有逃之者。非鬼逃也。心自逃耳。如人好色。卽色鬼逃。好貨。卽貨鬼逃。怒所不當。怒是怒鬼逃。懼所不當。懼是懼鬼逃也。釋訓編

衣冠佩玉。可以化強暴。深居簡出。可以却猛獸。定心寡欲。可以服鬼神。蘇黃門

君子對青天而懼。聞雷霆而不驚。履平地而恐。涉風波而不疑。樵談

非理外至。當如逢虎。卽時而避。勿恃格虎之勇。非理內起。當如探湯。卽時而止。勿縱染指之欲。晁文元

倪宗玉書室中有帖子云。德業觀前面人。名位觀後面人。愚問觀之將何如。宗玉曰。從前觀之。祇見我不如人。而益勵思齊之志。從後觀之。祇見人不如我。而自銷蹙蹬之憂。絲雪亭雜言

顧尚書東橋公璘。嘗著二警詞以自勵。其左警詞曰。言行擬之古人。則德進。功名付之天命。則心閒。報應念及子孫。則事平。受享慮及疾病。則用儉。其右警詞曰。好辯以招尤。不若訥嘿以怡性。廣交以延譽。不若索居以自全。厚費以多營。不若省事以守儉。呈能以誨妬。不若韜



精以示拙。噫。二詞真藥石之語也。

新知錄

福從善。禍從惡。人孰不祈福而免禍。何不究其所從。義得利。利得害人。孰不趨利而避害。何不辨其所得。

衡門錄

謹則無憂。忍則無辱。靜則常安。儉則常足。

自心先生

知足常足。終身不辱。知止常止。終身不恥。

全上

人或入荆棘中。徐以理之。則出旨哉斯言。

吳百峰日記

靜坐然後知平日之氣浮。守默然後知平日之言躁。省事然後知平日之費閒。閉戶然後知平日之交濫。寡慾然後知平日之病多。近情然後知平日之念刻。

長者言

齒以堅毀。故至人貴柔。刃以銳摧。故至人貴渾。神龍以難見稱瑞。故至人貴潛。滄海以汪洋難量。故至人貴深。  
莊子

辨含于訥。巧隱于拙。剛蓄于吳。直蘊于謙。明養于誨。五者藏用之道也。  
惺然錄

至道之用。嗇。鄙。細。不可。吉人之詞。寡。深密。不可。節俠之生。輕。鬪狠。不可。通達之財。疎。暴殄。不可。才子之氣。高。矜。驕。不可。廉吏之守。嚴。刻。剝。不可。  
書紳要語

以簡傲爲高。以諂諛爲禮。以刻薄爲聰明。以鬪茸爲寬。



大胥失之矣。省躬長語

磨礪砥礪。不見其損。有時而盡。種樹蓄養。不見其益。有時而大。積德累行。不知其善。有時而用。棄義背理。不知其惡。有時而亡。昭明文選

常人以嗜慾殺身。以貨財殺子孫。以政事殺民。以學術殺天下後世。吾無是四者。豈不快哉。劉下公

饒一著。添子孫之福壽。退一步。免隙駒之易過。忍一言。免駟馬之難追。息一怒。養身心之清和。救劫寶經

凡人粧成十分好。不如真色一分好。真色人自有一種

堪愛堪敬處。所以可貴。

衡門錄

嗜異味者。必得異病。挾怪性者。必得怪症。習陰謀者。必得陰禍。作奇態者。必得奇窮。莊子一生放曠。却曰。寓諸庸。原跳不出中庸二字也。

最樂編

范堯夫解他山之石。可以攻玉。王者溫潤之物。若將兩塊玉相磨。必磨不成。須是得他粗礪底物。方磨得出。譬如君子與小人處。爲小人侵凌。則修省畏避。動心忍性。增益預防。如此便得道理出來。

日益編

見美女時。做狼虎看。見黃金時。做糞土看。這箇中間。享



了多少清福。讓他說話。我只閉口。讓他指點。我只袖手。  
這箇中間。省了多少閑氣。我施有恩。不求他報。他結有  
怨。不與他較。這箇中間。寬了多少懷抱。忍不過時。著力  
再忍。受不得時。耐心且受。這箇中間。除了多少煩惱。世  
情濃。釀處淡得下。塵俗牽纏處。斬得下。這箇中間。息了  
多少妄想。緩步當車。晚食當肉。寡營是智。無病是福。這  
箇中間。討了多少受用。收得放心。戒得忿怒。薄得世味。  
遠得嗜慾。這箇中間。省了多少精神。既不作偏。亦不好  
事。既不損人。亦不利己。這箇中間。消了多少灾厄。

董元宰  
警世言

處利則要人做君子。我做小人。處名則要人做小人。我做君子。則惑之甚也。格言抄

勿謂一念可欺也。須知有天地鬼神之鑒察。勿謂一言可輕也。須知有前後左右之竊聽。勿謂一事可忽也。須知有身家性命之關係。勿謂一時可逞也。須知有禍福子孫之報應。沈繹堂座右銘

有一言而傷天地之和。一事而折終身之福者。切須檢點。長者言

仁厚刻薄。是修短關。謙抑盈滿。是禍福關。勤儉奢侈。是



貧富關。保養縱慾。是人鬼關。

警心錄

錢焜恬退高曠。嘗以三不識自許。謂誠心直道。不識人生有機械事。淡食敝衣。不識人世有嗜好。事委心任運。不識人世有徑竇事。

最樂編

品詣常觀勝于我者。則愧恥自生。處境常思不及我者。則怨尤自息。

警心錄

當樂境而不能享。畢竟薄福之人。當苦境而反覺甘。方是真修之士。

全上

青天白日的節義。自暗室屋漏中培來。旋乾轉坤的經。

綸自臨深履薄處得力

居家格言

自家好處要掩藏幾分。這是涵蓄以養深。別人不好處。要掩藏幾分。這是渾厚以養大。

格言鈔

士大夫當爲子孫造福。不當爲子孫求福。謹家規。崇儉朴。訓耕讀。積陰德。此造福也。廣田宅。結姻援。爭什一。鬻功名。此求福也。造福者澹而長。求福者濃而短。士大夫當爲此生惜名。不當爲此生市名。敦詩書。尚氣節。慎取與。謹威儀。此惜名也。競標榜。邀津貴。驚矯激。習模稜。此市名也。惜名者靜而休。市名者躁而拙。士大夫當爲一



家用財不當爲一家傷財。濟宗黨廣東脩救荒歉助義舉。此用財也。靡宮苑教歌舞奢讌會聚寶玩。此傷財也。用財者損而盈。傷財者滿而訕。士大夫當爲天下養身。不當爲天下惜身。省嗜慾減思慮戒忿怒節飲食。此養身也。規利害避勞怨營窟室守妻子。此惜身也。養身者嗇而大惜身者羶而細。

張侗初先生

辱之一字最所難忍。自古豪傑之士多由此敗者。竊意辱之來也。當察其人何如。彼爲小人耶。則直在我。何怒之有。彼爲君子耶。則直在彼。何怒之有。世人不審所自。

八金錄卷二  
來一以怒應之。此其所以相仇而相害也。歟。薛文清公

諺云。若要小兒安。常帶三分飢與寒。士君子亦須帶幾分飢寒。然後骨堅神緊。內可以練性。真外可以經世務。若向肥甘軟滑中。罨却悠悠忽忽。便斷送一生矣。陳眉公

喜時之言多失信。怒時之言多失體。長者言

前輩有云。戒酒後語。忌食時嗔。忍難忍事。恕不明人。常能持此。最得便宜。賓退錄

度量如海涵春育。應接如行雲流水。操存如白日青天。威儀如鳳文麟趾。言論如敲金戛石。持身如冰清玉潔。



襟抱如光風霽月。節概如泰山喬嶽。古今名喻

水至清則無魚。人至察則無徒。察察者有所不見。恢恢者何所不容。家語

凝重之人。德在此。福亦在此。薛文清公

禮義廉恥。可以律已。不可以繩人。律已則寡。過繩人則

寡合。書紳要語

人以厚道待人。正是自己占地步處。故曰寧令我容人。勿令人容我。寧令人負我。勿令我負人。衡門錄

齊劉計自少至老。不見喜怒之色。每于可競之地。輒以

不競勝之。或有凌之者。莫不退而愧服。余少而剛褊。事後不能無愧悔。嘗書晉人衛玠所云。人有不及。可以情恕。非義相干。可以理遣之語。以自警省。冬餘錄

聞人善則疑之。聞人惡則信之。此滿腔殺機也。秘笈

言必信。行必果。古之小人。今之君子。格言鈔

君子好成物故吉。小人好敗物故凶。程子

成德多在困窮。敗身多因得志。魏環溪

名公器也。不可以多取。莊子

好名是學者病。是不學者藥。魏環溪



莫大之禍。起于須臾之不忍。不可不謹。尹和靖

劉忠定公見司馬溫公。問盡心行已之要。公曰。其誠乎。

問行之何先。曰。自不妄語始。言行類編

無以仇隙而語盡。無以新交而歡盡。無以小人過悞而

法盡。警心錄

人。須在事上磨鍊。做工夫。乃有益。若只好靜。遇事便亂。

連那靜時工夫亦差。王文成公

或問夏原吉曰。公量可學乎。公曰。某幼時有犯者。未嘗

不怒。始忍于色。終忍于心。久則自熟。不與人較。何嘗不

自學來。警心錄

受人恩而不忍負者。其爲子必孝。爲臣必忠。

司馬溫公

覺人之詐。不形于言。受人之侮。不動于色。此中有無窮

學識。

格言鈔

王通教授河汾之間。弟子賈瓊問息謗。曰。無辨。問止怨。

曰。不爭。

警心錄

害身莫甚于色。故色慾聖人之豫戒。書曰。不邇聲色。孔

子曰。戒之在色。未有邇而能戒者。

羅念菴

當得意時。須尋一條退路。然後不死于安樂。當失意時。



須尋一條出路。然後可生于憂患。塵談

官怠于宦成。病加于小愈。禍生于懈怠。孝衰于妻子。察

此四者。慎終如始。座右銘

人不誠處。都在言語上。朱文公

凡一事而關人終身者。縱實見確聞。不可開口。凡一語而傷我長厚者。縱閒談酒謔。亦慎勿言。袁了凡

一座之中。有彈射人者。吾獨端莊沉默。以消之。此之謂

不言之教。同善錄

少言不惟養得德深。又養得氣完。而夢寐亦安。警語類錄

出言須思省。則思爲主。而言爲客。長者言

切不可隨衆議論。前人長短。要當已有真見。乃可。薛文清公

荀子云。贈人以言。重于金石珠玉。觀人以言。美于黼黻。

文章。聽人以言。樂于鐘鼓琴瑟。明心寶鑑

欲人無聞。莫若勿言。欲人無知。莫若勿爲。枚乘語

古人云。禍莫大于縱已之欲。惡莫大于言人之非。又云。

以言傷人者。利于刀斧。以術傷人者。毒于虎豹。皆名言。

也。自警言編

人須有容德。乃大。古謂山藪藏疾。川澤納汙。瑾瑜掩瑕。



有容之謂也。薛文清公

好名休要霸占也。須勻些兒惡名休要推辭也。須分些兒。呂新吾

英氣最害事。渾涵不露圭角最好。只觀其氣象便知涵養之淺深。薛文清公

范忠宣公戒子弟曰。恩怨分明。此四字非有道之言也。無好人三字。非有德之言也。蒙南鄉約

畱有餘不盡之巧。以還造化。畱有餘不盡之祿。以還朝廷。畱有餘不盡之財。以還百姓。畱有餘不盡之福。以還。

子孫。王叅政四萬銘

能改過則天地不怒。能安分則鬼神無權。同善錄

自責之外。無勝人之術。自強之外。無讓人之術。格言鈔

貧不足羞。可羞是貧。而無志。賤不足惡。可惡是賤。而無能。老不足歎。可歎是老。而虛生。死不足悲。可悲是死。而無稱。同善錄

常有小不快。事是好。消息若事事稱心。卽有大不稱心。事隨後至矣。知此理。可免怨尤。格言鈔

怒亦人情。能制爲尚。古惟顏子。能不遷怒。可見功夫甚



難怒而輕發。其爲害也大矣。一朝之忿。忘身及親。小不如意。怒形于色。總由義理不明。涵養無力。故血氣粗厲。而不能制也。有道之人心氣和平。神情安定。拂意之來。不爲所動。則澹然自化矣。若夫胸襟狹隘。不能容物。氣質粗浮。動多鬱勃。欲其存心修德。不亦難乎。

同善錄

俯仰身世之間。亦多故矣。而其要總貴于自立。能自立。則經權常變。確然有以自守。而不爲事物所搖奪。自立維何。讀書明理。承上率下。保身宜家。其大綱不出謹慎忠厚勤儉六字。

嚴述曾西牕剩話

修身

孝弟忠信禮義廉恥此八字是八箇柱子有八柱始能成字有八字始克成人。姚承菴家訓

人只秉一箇公守一箇正執一箇實持一箇平總來存一箇仁卽小有差失人亦自能亮我。全上

天下許多道理一人豈能兼收論學問只宜以不如人爲恥天下無窮福分一人豈能悉受論享用只宜以過人爲愧。全上

凡人不屈則不伸屈于此必伸于彼此感應自然之理尺蠖之屈以求信也龍蛇之蟄以存身也故但求其可



伸者于已而不必患其見屈于人但畱其可伸者于後而不必疑其見屈于今也

西臆辨語

神氣不收斂則不能發皇心思不凝聚則不能通徹學問不專一則不能有成此卽屈伸之理也引而伸之觸而通之凡事皆然

全上

吳五亭立身句云惟人萬物靈仁義闢宏造大患在有身沉冥非至道苟得物易櫻居正哀可澡圭臬曲無遁繩墨邪必討薰蕕一器分君子慎小草

補閣集





心鏡編卷三

勤學

讀書無疑者。須教有疑。有疑者。却要無疑。到這裏方是長進。朱夫子

諸葛亮誡子曰。夫君子之行。靜以修身。儉以養德。非澹泊無以明志。非寧靜無以致遠。夫學須靜也。才須學也。非學無以廣才。非志無以成學。怠慢則不能勵精。險躁則不能治性。年與時馳。意與歲去。遂成枯落。悲歎窮廬。將復何及。漢書

小兒輩不可以世事分讀書。但當以讀書通世事。岩棲幽事

山谷云。弟子諸病皆可醫。惟俗不可醫。余謂不然。醫俗

病者。獨有書耳。讀書鏡

百川學海而不至于海。邱陵學山而不至于山。是故惡夫

畫也。楊子

真理學。從五倫做起。大文章。自六經分來。荆園小語

士大夫三日不讀書。則義理不交于胸中。對鏡覺面目

可憎。向人亦語言無味。黃魯直

胡文定公布衣時。與孫明復石守道同讀書泰山。一坐



十年不歸。得家問。見上有平安二字。卽投之澗中。不復展閱。自警編

李永和杜門却掃。絕迹下帷。棄產營書。手自刪削。每歎曰。丈夫擁書萬卷。何假南面百城。讀書鏡

讀書須求良友。叅訂互考。大助性靈。譬登山臨水。必須結伴。與之嘲風弄月。則得眺覽之趣。又如禪門闡教。必須對叅。與之更端發難。則得宗風之趣。小窗清紀

王文成公寄諸用明書云。君子惟患學業之不修。科第遲速。所不論也。聞偕陽諸姪。去歲皆出應試。非不喜其

年少有志。然私心竊以爲不然。倘遂得志。豈不悞却此生耶。後生美質。須令晦養深厚。天道不翕聚則不能發。散。况人乎。花之千葉者無實。爲其英華太露耳。若不以吾言爲迂闊。當自有進步處矣。荆園小語

讀書須于五更清晨時用功。較之辰巳以後。幾倍有益。蓋平旦乃天地清爽之氣。最當挹取。昔人云。一日之計。在于寅。人于此時學事。事必精萃。人于此時讀書。書必熟透。警心錄

子弟擇師。必須延敦厚博學。習知禮教者。厚其束脩。不



徒專尚文詞。孫簡肅公家訓

今人姑息自恕。不思進學。乃謂過今日。尚有明日。殊不知過一日。無一日也。可不懼哉。省約三書

晉平公問于師曠曰。吾年七十。欲學。恐已晚矣。師曠曰。何不炳燭乎。臣聞之。少而好學。如日出之陽。壯而好學。如日中之光。老而好學。如炳燭之明。炳燭之明。孰與昧行乎。平公曰。善哉。鶴林玉露

讀書不獨養人氣質。且能養人精神。蓋義理收攝故也。  
警心錄

凡讀書思索之久。當閉目靜坐。養其神氣。少時再從事于思索。則心清而義理自見。薛文清公

生子質敏才俊。可憂勿喜。便思豫加防檢。陶習謙晦。沈厚性情。禁絕浮誇傲誕者。與之游。庶可成遠大之器。孫公

家訓

子弟性資鈍拙。莫將舉業擔悞。早令習練公私百務。大都教子。只是要渠做好人。不必定要渠做好官。如農桑本務。商賈末業。書畫醫卜。皆可食力資身。人有常業。則富不暇爲非。貧不至失節。但皆不可不學。以延讀書種。



子。同上

柳世隆性清廉。惟盛事墳典。張緒問曰。觀君舉措。當以清名遺子孫耶。荅曰。一身之外。亦復何須。子孫不才。將爲爭府。如其材也。不如一經。警心錄

劉峻好學。寄人廡下。自課讀書。常燎麻炬。從夕達旦。時或昏睡。爇其鬚髮。及覺復讀。其精力如此。苦所見不博。聞有異書。必往祈借。時人謂之書淫。宋書

范魯公質。自從仕。未嘗釋卷。曰。嘗有異人言。吾當大用。苟如是。無學術。何以處之。眉公秘笈

倪文節公云。松聲。澗聲。山禽聲。夜虫聲。鶴聲。琴聲。棋子落聲。雨滴堦聲。雪洒窗聲。煎茶聲。皆聲之至清者也。而讀書聲爲最。聞他人讀書聲。已極喜。更聞子弟讀書聲。則喜不可勝言矣。又云。天下之事。利害常相半。惟書不問貴賤貧富老少。觀書一卷。則有一卷之益。觀書一日。則有一日之益。故有全益無少害也。同上

靜坐後。見萬物皆有春意。學者只要靜箇心。此上頭儘有進步。程伯子

心地要寬平。識見要超卓。規模要濶遠。踐履要篤實。能



是四者可以學矣。

陳白沙

後生輩胸中落意氣兩字。則交游定不得力。落騷雅兩字。則讀書定不深心。

最樂編

凡子弟所當痛戒者不一。而以不聽父兄師長之言。及昵比淫朋爲最。若戒是二者。自能尋向上去。

衡門錄

士君子不能陶鎔人。畢竟學問中火力未透。

長者言

但願溫恭直諒之友。來此講學論道。示以孝友謙和之行。德業相勸。過失相規。以教訓我子弟。使毋陷于非僻。不願狂躁惰慢之徒。來此博奕飲酒。長傲飾非。導以驕

奢淫蕩之事。誘以貪財黷貨之謀。冥頑無恥。煽惑鼓動。以益我子弟之不肖。嗚呼。由前之說是爲良士。由後之說是謂凶人。我子弟苟遠良士而近凶人。是謂逆子。戒之戒之。

陽明先生客座私祝文

學止于誇多鬪靡。不知性靈爲何物。變化氣質爲何事。人欲日肆。天理日消。其不陷于禽獸者幾希。

陳白沙

變化氣質。居常無可見。惟當利害。經變故遭屈辱。平時忿怒者。到此能不忿怒。憂惶失措者。能不憂惶失措。便是得力處。亦便是用力處。

王文成公



田鼠化爲鴛。雀入大水爲蛤。虫魚且有變化。而人至老  
不變何哉。善用功者。月異而歲不同。時異而日不同。長者  
言

謂舉業與聖賢之學相戾者。非也。程子曰。心苟不忘。則  
雖應接俗事。無非眞學。無非道也。而況于舉業乎。謂舉  
業與聖賢之學不相戾者。亦非也。程子曰。心苟忘之。則  
雖身由之。亦是俗事。而況于舉業乎。忘與不忘之間。不  
容以髮。要在深思默識。所指謂不忘者。何事耶。知此則  
知學矣。王文成公

伊川云。以富貴驕人。固非美事。以學問驕人。害亦不細。此格言也。予聞尹彥明從學于伊川。聞見日新。謝顯道謂之曰。公既有所聞。正如服烏頭。苟無以制之。則藥發而患生矣。顯道此言。誠可爲淺露之戒。

張子韶

讀書貴于能用。若讀而不能。則雖博如書肆。辨若懸河。猶爲無益。孔子所謂雖多亦奚以爲也。故孔光不識進退字。張禹不識剛正字。許敬宗不識忠孝字。柳宗元不識節義字。彼蓋一無所得。所謂能讀而不能。用者也。與未嘗讀者何異哉。郭登咏蠹魚詩云。瑣瑣如何也。賦



形雖無鱗甲有魚名。元來全不知文意。枉向書中過一生。今之學者。其殆蠹魚之類乎。可慨已。新知錄

潘良貴字子賤。有磨鏡帖行于世。言讀書者。將以治心。養性。如用藥以磨鏡也。若積藥鏡上。而不加磨治。未必不反爲鏡。累張禹孔光是已。其大意如此。世以爲名言。子賤自號默成居士。鶴林玉露

北魏主珪問博士李先曰。天下何物最益人神智。先曰。莫若書。王荊公詩曰。物變有萬殊。心思纔一曲。讀書謂耶。夫著一能讀書之心。橫于胸中。則錮滯有我。其心已。

與古人天淵懸隔何自而得其活法妙用哉

同上

昔陳烈山苦無記性。一日讀孟子學問之道無他。求其放心而已矣。忽悟曰。吾有放心。不曾收拾。如何記得書。遂閉門靜坐。不讀書百餘日。以收放心。後去讀書。遂一覽無遺。

朱子

爲善最樂。讀書更佳。只此二句。知其味。便是天下大福。人少年欲知爲善。又必由讀書。又云。關了門。閉了戶。把絕四頭路。正是讀書時也。何謂頭路。人心紛擾。要長要短。皆是頭路。須一切斷絕。件件看破。都沒要緊。件件寡。



去寡之又寡。以至于無。則此心空明虛妙。人品日高。文章日進。此爲善讀書人。同上

病中信手抽得通鑑一兩卷看。正值數件難處置事。不覺骨寒毛聳。心膽墮地。向來只作文字看過。全不細心。真是枉讀了古人書。乃知讀書務要設身處地。打算一番。纔成一箇致知學問。同上

讀書須讀到不忍舍處。方是見得真味。同上

答陳膚仲曰。承以家務叢委妨于學問爲憂。此固無可奈何者。然亦只此便是用功實地。但每事看得道理不

令容易放過。更于其間見得平日病痛。痛加剪除。則爲學之道。何以加此。同上

人多是恥于問人。假使今日問于人。明日勝于人。有何不可。蓋聚天下衆人之善者。聖人也。此舜所以好問。孔子所以無常師也。教家要略

呂獻可嘗言。讀書不須多讀。得一字。行取一字。伊川亦嘗言。讀得一尺。不如行得一寸。秘笈

擘書覆瓿。裂史粘牕。誰不惜之士。厄窮途。偶落陷阱。聞者不憐。遇者不顧。聽其死生。是賢紙上之字。而仇腹中。



之文哀哉。黃涪翁

趙季仁謂羅景倫曰。某生平有三願。一願識盡世間好人。二願讀盡世間好書。三願看盡世間好山水。羅曰。盡則安能。但身到處。莫放過耳。讀書者當作此觀。秘笈

君子之學。務求在己而已。毀譽榮辱之來。非獨不以動其心。且資之以爲切磋砥礪之地。故君子無入而不得正。以其無入而非學也。王陽明

董遇挾經書投閒習誦。人從學者。不強教之。云先讀百遍。而義自見。樂城云。看書如服藥。藥多力自行。讀書鏡

山谷論書法云。此事須人自體會得。不可見立論便興  
爭也。可移以爲講學者告。嚴逸山集



心鏡編卷四

積德

爲善者。天報之以福。爲不善者。天報之以禍。家語

爲不善于顯明之中者。人得而誅之。爲不善于幽闇之中者。鬼得而誅之。莊子

漢明帝問東平王蒼。處家何者最樂。王曰。爲善最樂。漢史

漢昭烈將終。勅後主曰。勿以惡小而爲之。勿以善小而爲之。三國志

壞人之善。無後。敗人之成。天誅。越絕書

以歲有凶穰而荒其稼穡者。非良農也。以行有禍福而改其善道者。非良士也。徐幹中論

孫叔敖幼時出遊而還。憂而不食。母問其故。叔敖泣對曰。人言見兩頭蛇必死。兒今見之。是以憂。母曰。蛇今安在。曰。恐後人又見。兒因殺而埋之。母曰。吾聞有陰德者。必有陽報。德集百祥。仁除百禍。天處高而聽卑。汝必興楚矣。史記

凡人在顛沛患難。善用一言解救。上資祖考。下蔭兒孫。



天地一無所爲。只以生萬物爲事。人念念在利濟。便是  
天地了也。故曰。宰。相。有。日。日。可。行。的。善。事。乞。丐。有。日。日。  
可。行。的。善。事。只。是。當。面。蹉。過。耳。晦翁

富貴家宜勸他寬。聰明人宜勸他厚。長者言

吾本薄福人。宜行厚德事。吾本薄德人。宜行惜福事。格言

鈔

薄福者必刻薄。刻薄則福益薄矣。厚福者必寬厚。寬厚  
則福益厚矣。同上

識些道理。不做好人。天地鬼神亦深惡之。蓋不識好惡。

如童稚。如醉人。雖有罪。可赦。若知而故犯。不可免也。厚生

訓纂

作好人。眼前覺得不便宜。總算來是大便宜。作不好人。眼前覺得便宜。總算來是大不便宜。千古以來。成敗昭然。迷人尚不覺悟。真是可哀。高忠憲公家訓

處富貴之境。要知貧賤人痛癢。值少壯之時。須念衰老人辛酸。居安樂之場。當體患難人景况。立旁觀之地。應識局中人苦心。航中帆

天之生人。其耳目口鼻四肢百體。無富貴貧賤一也。世



間之飢而不得食。寒而不得衣。甚至終身不識有室家之樂者。吾不知其幾矣。富貴之人。豈惟無飢。且肥甘足于口。豈惟無寒。且輕煖足于體。華堂峻宇。妾媵滿前。靡有求而弗得。靡有欲而弗遂。天之厚我。不越庸人萬萬哉。故雖日行方便。猶不能補報天之萬一。而乃或任其饕餮之性。恃勢凌人。則天其喜我乎。惡我乎。子孫其受福乎。此理甚明。不待細思而可曉也。

衡門錄

積金以遺子孫。子孫未必能守。積書以遺子孫。子孫未必能讀。不如積陰德于冥冥之中。以爲子孫常久之計。

司馬溫公

八金錄卷四

有心無相。相逐心生。有相無心。相從心滅。水鏡錄

以忠孝遺子孫者昌。以智術遺子孫者亡。以讓接物者強。以善自衛者良。景行錄

爲善之人。非獨其宗族親戚愛之。朋友鄉黨敬之。雖鬼神亦陰相之。爲惡之人。非獨其宗族親戚叛之。朋友鄉黨怨之。雖鬼神亦陰殛之。故積善之家。必有餘慶。積不善之家。必有餘殃。王陽明先生

凡人有勢不可使盡。有福不可享盡。貧困不可欺盡。此



三者。乃天地循環。周而復始。故行善者。福雖未至。禍自遠矣。行惡者。禍雖未至。福自遠矣。行善之人。如春園之草。不見其長。日有所增。行惡之人。如磨刀之石。不見其損。日有所虧。損人利己。切宜戒之。應驗錄

當厄之施。甘于時雨。傷心之語。毒于陰兵。治心編

陳璣晚年家貧。勇于行義。嘗訓諸子。遇貧者宜隨力賑之。不必計多寡。若必待富而後行。恐終無濟人之期。警心錄

袁了凡與陳穎亭書曰。我輩平日辛勤刻苦。爲子孫創

業者。死來皆用不著。所可恃以瞑目而釋然無憾者。惟此修德行義之事而已。大抵人受命于天生來之福有限。積來之福無窮。警心錄

凡爲善而人知之。則爲陽善。爲善而人不知。則爲陰德。天報之。陽善享世名。名亦福也。名者造物所忌。世之享盛名而寔不副者。有奇禍。人之無他腸而橫被惡名者。子孫往往驟發。陰陽之際微矣哉。袁了凡

口過一節。犯者甚衆。隨風訕笑。不能自禁。無論言之太過。卽語語眞實。已將此人肺肝。揭摘無遺矣。博一時之



快意積一生之陰惡損德不少孟子曰言人之不善當如後患何思之慎之

吳百峰日記

現在之福積自祖宗者不可不惜將來之福貽于子孫者不可不培

楊襄毅公父瞻言

現在之福如點燈隨點則隨竭將來之福如添油愈添則愈潤

同上

有術者謁黃直卿云善算星數知人禍福直卿曰吾亦有箇大數書曰惠迪吉從逆凶作善降之百祥作不善降之百殃大學曰言悖而出者亦悖而入貨悖而入者

亦悖而出。此箇數亘古至今不差。豈不優于子之算數乎。  
鶴林玉露

杜祁公衍性好施。張瓌曰。公之好施。人所能及也。其不  
妄施。人之所不能及也。吁。今之施者。半及於沙門弟子  
止矣。余以爲不惟施之三寶。而當並施之三教。不惟施  
之三教。而當首施之三族。  
讀書鏡

教與學只是一事。我誠心爲善。人自起同善之心。則教  
亦行乎其中矣。要人爲善。誠心委曲以導之。則學亦在  
其中矣。  
緒山先生



凡善救人者必先解其怒而示以所樂聞然後其言不  
勸自行若人怒彼不是我却以爲是何異燎之方盛又  
搗膏以熾之也

福壽全書

樂與人爲善者人有片善則節取之有微善則獎借之  
未善則勸教之欲善則贊成之卽其不能爲善也亦常  
以善人期待之初無鄙棄之意至于人之有過則非但  
不敢言之且惟恐或聞之或親見其過也則乘機以化  
誘之委曲以彌縫之初無責怒人之意如是與人真如  
春風太和之鼓物被其澤而化者固有出于不知不覺

者也。故其功莫大焉。

同善錄

見人學好。多方贊成。見人差錯。多方提醒。見人豐顯。則談其致福之由。見人苦難。則原其所處之不幸。斯長者之道也。若忌成樂敗。何與人事。徒自壞心術耳。

同上

人之過失。或素相親厚。欲其感悟。只宜僻靜處。面與其人委曲言之。出我之口。入彼之耳。方是相愛相成之至。彼亦知感。若向他人聲揚不已。或對衆面責。彼必不樂。且或強辯不從。更塞他覺悟的路了。

同上

昔人語科第者曰。半積陰功。半讀書。誠然。然陰功非但



分人以財而已。孜孜切切。惟以濟人。救人爲事行之數十年。此意純熟。動念卽是方。謂之陰功。何者。此乃仁心也。仁則生生則吉。而科第在其中矣。此萬驗良方。幸勿忽之。

高忠憲公

偶友人談士大夫家多走泄元氣。余曰。不必論他不義事。只一得第便走泄。又未須論得第。只子弟能搦管行文。便走泄。要知祖父質朴敦龐一段意思。纔向衣冠文采已耗去強半。故發達未便是好消息。厚者力培之。薄者力削之。

嚴正邦白雲小言

寒夜煖衾熟睡。便須知惜福。便須知謹身省事之功。問如何。曰。世間多少沒衾蓋的人。衾中多少睡不著的人。同上

人有能學做一好事者。無有能學發一好念者。心猶種也。念猶苗也。無此種。則無此苗。同上

羅夫人。楊誠齋婦也。平居衣飾。止用銀帛。生四子三女。悉自乳。曰。飢人子以哺。吾子是何心哉。三子皆登第。爾

珪筆乘

韓山子謂人。每臨終時。憂子孫異日貧苦。不思子孫貧



苦從祖宗積惡來。平日專事苛刻。討便宜。損人利己。靡所不爲。是日日殺子孫也。平日我自殺之。臨終我自憂之。不惑之甚哉。

蓄德錄

或問司馬溫公曰。張湯矯僞刻薄。而後嗣顯榮。意者積善餘慶。積惡餘殃。乃虛語耶。公曰。積者。繼世相因之謂也。如欒書有惠于晉。厲雖剛愎。猶保宗祀。書之餘慶也。至盈無德。卿族遂亡。厲之餘殃也。祖父有德。子孫爲不善。未免禍敗。祖父不善。而子孫有德。福祿將集。殃何有焉。祖父不善。子孫又無德。以蓋前人之愆。則餘殃及之。

八金剛經卷四  
張湯雖險詖。有子安世。保輔漢室。子孫嗣之。率皆忠恪。信厚。光顯歷世。宜矣。警心錄

趙閱道嘗知越州。值歲大歉。公召州之富民畢集。勸誘以賑濟之義。卽自解腰間金帶置庭下。于是施者雲集。所全活十數萬。曾子固作救災記。備述其事。遜齋集

蘇長公卜居陽羨。以五百緡買一宅。將入居之。偶夜行。聞有老婦哭之而哀。公問之。嫗言舊居相傳百年。一旦移去。所以泣也。問其居何在。正五百緡所買者。卽取屋券焚之。不受原直。遂自陽羨還毘陵。勿徙宅矣。勸善錄



趙清獻公抃寬厚長者與物無忤家于三衢所居甚隘  
弟姪有容悅公意者以厚直易隣翁之居期廣公第公  
聞之不樂曰吾與此翁三世爲隣矣忍棄之乎命亟還  
翁居而不追其直

自警編

凡人爲善事而不成正不須怨天尤人此乃天之所愛  
終無後患如見他人爲不善事常稱意者不須多羨乃  
天所棄待其積惡深厚從而殄滅之不在其身則在其  
子孫

同上

廖德明朱文公高弟也夢懷刺候謁廟廡下謁者索刺

出諸袖。乃宣敎郎廖某。遂覺。後登第。改秩。以宣敎郎宰  
閩。思前夢。恐官止此。不欲行。親友相勸。爲質之文公。公  
因指案上物曰。人與器物不同。如筆止能爲筆。劍不能  
爲琴。故其成毀久速。有一定之數。人則不然。固有朝爲  
蹠。而暮爲舜者。其吉凶禍福。亦隨之而變。難以一定言。  
今子赴官。但當充廣道性。力行好事。前夢不足芥蒂德。  
明官至正郎。同上

但願親戚人人豐足。寧我隻貧自守。若使一人富厚。九  
族飢寒。便是極缺陷處。溫節孝家訓



余嘗自揣。深過涯分。特書小聯云。得此已過矣。敢萌半點私心。求爲可繼也。須積十分陰德。

姚承菴家訓

宋王沂公父拾遺字紙。香湯洗曝燒之。夢宣聖賜曾子爲嗣。未幾生男。遂名曾三元。及第爲賢相。楊全善埋字紙。而五世登科。李子材葬字紙。而置身通顯。瀘州楊百行坐經文而舉家害癩。昌郡鮮于坤殘孟子而全家滅亡。果報彰彰。古今炯鑒。人可不敬惜字紙哉。

同善錄

語曰。討便宜處失便宜。此處字極有味。蓋此念纔一思。討便宜。便自壞了心術。自損了陰陽。大失便宜。卽在此。

處矣。不必到失便宜時。然後見也。

姚承菴家訓

同年建德王廷嘗語余曰。渠爲諸生時。提學歲考後。適有分守某叅政行縣。諸生謁見。間言及考事。惟問案首幫補進學人數而止。餘不問焉。越數日。分巡某僉事繼至。亦對諸生言及考事。惟問黜退停降撲責人數而止。餘不問焉。諸生私相論曰。二公發問相反如此。吾屬識之。且觀二公去後。祿位何如。乃後分守公官至戶部侍郎。子相繼登第。僉事公陞陝西副使。遇安化作亂。竟被害。吁。豈謂一問遂能致禍福哉。蓋言者心之聲而行之。



表也。存心仁厚。則一言一行。動依于厚。存心刻薄。則一言一行。動依于薄。君子以厚德載物。彼殘忍刻薄之人。豈享福祿之器哉。

陳揀塘見聞紀訓

魯國之法。魯人有贖人。臣妾于諸侯。皆受金于府。子貢贖人而不受金。孔子聞而惡之。曰。賜失之矣。夫聖人舉事。可以移風易俗。而教道可施于百姓。非獨適已之行也。今魯國富者寡而貧者衆。受金則爲不廉。何以相贖乎。自今以後。不復贖人于諸侯矣。子路拯人於溺。人謝之以牛。子路受之。孔子喜曰。自今魯國多拯人於溺矣。

自俗眼觀之。子貢不受金爲優。子路之受牛爲劣。孔子則取由而黜賜焉。乃知人之爲善。不論現行而論流弊。不論一時而論久遠。不論一身而論天下。現行雖善而其流足以害人。則似善而寔非也。現行雖不善而其流足以濟人。則非善而寔是也。然此就一節論之耳。他如非義之義。非禮之禮。非信之信。非慈之慈。皆當決擇。廣益

編

吳處厚論心相有三十六善。焚香讀書一也。作事有剛有柔二也。慕道近君子三也。安分寡營四也。不嗜殺五



也。爲善不求人知。六也。忍耐。七也。不厭人乞假。八也。喜人規切。九也。常自知非。十也。聞事不驚張。十一也。與人期不失信。十二也。無作好作惡。十三也。不談亂。十四也。夜臥不便睡著。馬上不回顧。十五也。不談閨閫事。十六也。作事周匝有終始。十七也。不忘人恩。十八也。揚善掩惡。十九也。急難中濟人。寬慰人。二十也。不助強欺弱。二十一也。不忘故舊。二十二也。能損己爲利人事。二十三也。知人詐僞能含容。二十四也。能惜福。二十五也。受享知慚愧。二十六也。語言有序。二十七也。當人語次不攙。

奪二十八也不嫌惡衣食二十九也不面訐人三十也  
知人飢渴勞苦三十一也不念舊惡三十二也常思退  
步讓人三十三也盡心爲人謀三十四也受謗不急自  
解三十五也精信因果三十六也全者福祿令終未全  
福祿半之故相形不如相心求人相不如自己相青箱雜記  
韓魏公爲丞相每見文字有攻人隱惡者卽手自封之  
未嘗使人見自警編

方諫議謹言爲侍御史時丁謂貶遣謹言籍其家得士  
大夫書多干請關通者悉焚之不以聞世稱長者同上



有修橋人。有毀橋人。此天堂地獄之小因也。有坐轎人。有荷轎人。此天堂地獄之小果也。餘可推矣。龍舒居士

或曰。陰德曷從而修之。曰。凡可修者。不以富貴貧賤拘。但于水火盜賊。飢寒疾苦。刑獄逼迫。逆旅狼狽。險阻艱難。至于飛潛動植。于力到處。種種方便。雖一言一語之間。必期有益一動一止之際。必欲無傷。如此存心。則陰德無限量而受報如之矣。保生心鑑

范文正公守邠州。暇日率僚屬登樓置酒。未發觴。見縈經數人。營理喪具者。公亟令詢之。乃寄居士人。卒于邠。

將出殯。賙斂棺槨。皆所未具。公憮然。卽徹宴席。厚賙給之。使畢其事。坐客感歎。有泣下者。日益編

曹彬知徐州。有吏犯罪。立案逾年。杖之人皆不測。曰。我聞此人新娶婦。若杖之。舅姑必以婦爲不利。朝夕呵罵。使不能自存。我故緩其事。而法亦不赦也。德慧錄

楊州衙胥某。素行不法。而富于財。值辛卯夏。飢民滿路。某煮粥賑濟。喫粥一碗者。償錢一文。時按院秦世禎巡視淮揚。微服私行。向衙胥云。汝既有此救民美意。併不索此一文錢。豈不大佳。衙胥某云。吾非敢云賑飢之粥。



也。吾固賣粥而第損其價耳。蓋下等百姓固無論。若平時有體面者。雖飢餓欲死。有不肯至賑粥之處者矣。吾名爲賣粥。則彼持錢欣欣而來。喫之有名。并可買歸給其妻女之在家飢餓者。于計爲便耳。按院聞其言稱善。私識其姓名而去。及按院來揚蒞任。有幾詞告此衙胥發其舊事者。俱批賑粥免究。警心錄


安溪李文貞公云。人能勉強便好。六家叔少時。聞人家有不祥事。便有喜色。余規之曰。叔父何爲倖人之災。樂人之禍。叔父頷之。自後便強爲咨嗟。或作愁苦酸悽。不

可忍耐之狀其始未必卽出于實心到後來便習而成性他如今福祿壽考甲于一族若那意不變便非享福

之相

榕村語錄







可忍之狀其始未必出于實心到後來便習而成  
性他如今福祿壽考甲于一族若邪意不變便非幸福  
之相

格村語錄



